



Sesida dals

Communitgà ils

Protocol nr.

12 da mars 2019

13 da mars 2019

163

Incumbensa Hardegger

concernent la revisiun da la lescha davart la promoziun da la tgira d'uffants
cumplementara a la famiglia en il chantun Grischun

Resposta da la regenza

Dapi l'introducziun da la lescha davart la promoziun da la tgira d'uffants cumplementara a la famiglia en il chantun Grischun l'onn 2003 èn las purschidas vegnidas extendidas fermamain en quest sector. Percurschibel è quai en spezial vi da l'augment dals uffants tgirads da 1163 l'onn 2004 a 2829 l'onn 2018. Ils motivs da questa creschientscha èn en spezial svilups socials ed economics. La tgira d'uffants instituziunala ha survegnì sustegn da bieras varts. Ella promova la cumpatibilitad da la professiun cun la famiglia, serva a l'activitad da gudogn ed a la disponibladad da persunas qualifitgadas, contribuescha a l'augment da las entradas fiscalas, promova l'egualitad tranter dunna ed um e vala en l'economia en general sco avantatg dal lieu. Quests factors decleran l'extensiun da la paletta da purschidas menziunada en l'incumbensa. Oz datti purschidas quasi dapertut en il Grischun.

La regenza parta la valitaziun dals redactors da l'incumbensa. Il sistem da la tgira d'uffants è sa cumprovà da princip. Ma i sa mussan er mancanzas fitg concretas che duain vegnir mitigiadas sche pussaivel cun cleras mesiras. Sa basond sin il punct central da svilup (PS) 11/23 "Promover la coesiun sociala e garantir la segirezza sociala" en il rom dal program da la regenza 2017 fin 2020 è vegnida controllada la finanziaziun da la tgira d'uffants complementara a la famiglia. Ils resultats da questa examinaziun mussan er ch'il problem principal da la finanziaziun vertenta è il dischavantaggiament da purschiders da prestaziuns en territoris cun bieras persunas responsablas per l'educaziun che han entradas relativamain pitschnas. Questa mancanza resulta dal subvenziunament da tut ils furniturs da prestaziuns cun ina tariffa da contribuziun unitara d'ina vart e da la graduaziun da las tariffas da las persunas responsablas per l'educaziun tenor lur capacitad economica da l'autra vart. Uschia dependan las entradas e la survivenza dals furniturs da prestaziuns da las entradas e da la facultad da las persunas responsablas per l'educaziun. Per che tut las famiglias possian profitar da las purschidas, sto vegnir examinà in subvenziunament pli intenziunà. I ston vegnir resguardadas en quest connex la capacitad finanziaza da las famiglias, ma er da las regiuns resp. vischnancas. Ina mesira cunter quai è gia prevista en il rom da las revisiuns da leschas concernent la flexibilisaziun da las finanzas (GrFlex). En la dimensiun da la distgargia netta dal chantun da var 400 000 francs per onn grazia a l'aboliziun da la legislaziun davart las contribuziuns da maternitad duai la tgira d'uffants complementara a la famiglia vegnir sustegnida pli fitg, e quai senza obligar las vischnancas da pajar contribuziuns supplementaras. La regenza examinescha da sustegnair cun la contribuziun sistematicamain purschidas,

cun las qualas vegnan tgirads uffants da personas responsablas per l'educaziun che derivan da vischnancas cun ina pitschna forza fiscala per persuna natirala.

In'ulteriura difficultad è la gronda lavur administrativa dals furniturs da prestaziuns per fixar las tariffas da las personas responsablas per l'educaziun. In aspect supplementar da quest problem è il fatg che las personas responsablas per l'educaziun ston preschentar datas sensibilas sco las datas fiscalas envers furniturs da prestaziuns privats. En il rom da las adattaziuns ston er quests process vegnir examinads.

Cun la revisiun totala da l'ordinaziun davart la promoziun da la tgira d'uffants complementara a la famiglia en il chantun Grischnun (DG 548.310) dal 1. da schaner 2013 èn ils custs normads praticamain vegnids fixads, perquai ch'il svilup dals custs normads dapi l'onn 2006 ha mussà che la tariffa dals custs normads è sa midada mo minimalmain. Tenor l'art. 6 al. 2 da questa ordinaziun s'orienteschan ils custs normads a las expensas dals onns precedents dals furniturs reconuschids. Quests custs vegnan controllads periodicamain. Questa controlla periodica è vegnida fatga en il rom dal PS 11/23. Da quella è resultada ina tariffa dals custs normads da 9.60 francs per ura da tgira (fin ussa 9.05 francs). La regenza planisescha d'adattar ils custs normads per l'onn 2021. L'augment deliberescha contribuziuns supplementaras dal chantun e da las vischnancas en la dimensiun d'ulteriurs 400 000 francs per onn. Resalvada resta la concessiun dal credit tras il cussegl grond. Ils custs normads duain vegnir augmentads il medem mument sco l'entrada en vigur da las revisiuns da leschas en il rom da GrFlex. Per quests augments da las subvenziuns planisescha la regenza d'inoltrar a la confederaziun ina dumonda per agids finansials. En il rom da quests agids finansials sa participass la confederaziun als augments da las subvenziuns. La participaziun sa reducescha cun la durada da la contribuziun ed importa l'emprim onn 65 %, il segund onn 35 % ed il terz onn 10 % da l'augment respectiv da las subvenziuns. Pia profitan las vischnancas ed il chantun il pli fitg da las subvenziuns federalas, sche tut ils augments da las subvenziuns entran en vigur il medem onn.

Pervia da la relevanza social-politica ed economic-politica da la tgira d'uffants complementara a la famiglia reconuscha la regenza il basegn d'agir urgent en quest sector. Cun las adattaziuns planisadas concernent la tariffa dals custs normads sco er en il rom da GrFlex è la regenza pronta da prender mesiras directas. Ulteriuras mesiras vegnan examinadas en il rom dal PS 11/23.

Sa basond sin questas consideraziuns propona la regenza al cussegl grond d'acceptar questa incumbensa.



En num da la Regenza

Il president:

Il chancelier:

Dr. Jon Domenic Parolini

Daniel Spadin